

# Antton Aranburu, XXXVIII. Santixabel Bertsopaper Lehiaketako irabazlea

**U**rdaira Sagardoarekin bertsotan izeneko bertso sortarekin gailendu zen Antton Aranburu.

## 1-Sagardoa

Baserri lur-sailetan  
sagasti zaharra  
etxeko izarra  
garai batean gure  
poztasun bakarra;  
sagarrondoan erne  
lore goiztiarra  
euri eta eguzki  
gerora sagarra,  
orain hemen zatoz zu  
kupeletik zzzzaaarrra!

## 2-Bere graziya

Handik eta hemendik  
gu zure etxera  
erromes antzera  
aurrerako pausoan  
inoiz ez atzera;  
inguratzen bagara  
kupelen ertzera  
gauza bat dago garbi  
txotxetik txotxera;  
grazia aparteko  
edaria zera.

## 3-Urdaira

“Ez dut nahi hemen nire  
burua juzkatu  
baina ez kezkatu  
nire graziya nahi dut  
zuekin ospatu;  
aspaldi hartu nuen  
hementxe ostatu  
bi mendek dezakete  
hau egiaztatu  
pentsa zenbatak nauen  
Urdairan dastatu”.



*“Aitortuko ditugu / publiko egiyak / gure kolejiyuak / sagardotegiyak”.*

## 4-Udarregi

Behin agertu zituen  
gure Udarregiyak  
Juan Joxe haundiyak  
Pello Errotarentzat  
arrazoi garbiyak;  
honela jaso ditu  
gure memoriyak:  
aitortuko ditugu  
publiko egiyak  
gure kolejiyuak  
sagardotegiyak.

## 5-Sagardoa alkate

“Zenbat maitasun eta  
zenbat borondate  
sortzetik gaur arte  
denok sagardozale  
onak baitzerate;  
herritar askok hala  
aitortu didate  
eta usurbildarrek  
halaxe naukate:  
aspaldiko urtetan  
herriko alkate”.

## 6-“Usurbildarra naiz”

“Eguzkiak eguzki  
ta ekaitzak ekaitz  
ez da hain sinesgaitz  
hementxe nauzuela  
aspaldiko garaiz;  
kontu honek ez badu  
inor jartzen bekaitz  
aitortuko dizuet  
sentimentu alaiz:  
jatorriz ni neu ere  
usurbildarra naiz”.

## 7-Hamazazpigarrena

Hiruzpalau tragoxka  
edo agian bortz  
egiteko asmoz  
kupel artera zuzen  
Urdairara gatoz;  
barruak inoiz esan  
dezakenarren otx!  
mantsoagatik, mugi!,  
mugi, mekaben zotz!  
hamazazpigarrenez  
egin dezagun txotx!

## 8-“Poliki edantzak!”

“Merezi ditzaket nik  
zuen alabantzak  
guztion gorantzak  
baina, aizak, hirekin  
zauzkat nik zalantzak,  
ikusi besterik ez  
hor hire balantzak  
azkenik ez dik, motell,  
hire ipur-dantzak,  
hemendikan aurrera  
poliki edantzak!”

## 9-Laster arte!

Sagardoak berekin  
hainbeste botere  
txarrik ez batere  
hori sagardozale  
denontzat mesede;  
lagun leiala izan  
dugun mendez-mende  
gaur ere portatu da  
jator, alafede!  
gaizkitxo goaz berriz  
etortzeko ere!

## 10-Gora sagardoa!

Ez bada izan ona,  
hortik onakoa  
guretzat gaurkoa!  
zertxobait edan dugu  
agian mordoia;  
berriro elkartzea  
ez da milagroa  
beraz honako hauxe  
guk azken tragoa,  
agur Urdaira eta  
gora sagardoa!

## Urdaira

### Sagardoarekin bertsotan

Egilea: Antton Aranburu.  
Doinua: “Esnasaltzailearena”